


Ngā Wheako o te Manaaki Tamariki ki Aotearoa: Ngā Kitenga Matua 2021/2022

Tā ngā uepū whai i te National Care Standards
me te Related Matters Regulations

TE WĀ PŪRONGO 1 HŪRAE 2021 - 30 HUNE 2022





Aro mārama

Clear insight

Aro pono

Truthful insight

Aro motuhake


Independent insight

Aroha

Caring insight

Aroturuki Tamariki

*Independent
Children's Monitor*



Crown copyright © 2023. Copyright material in this report is protected by copyright owned by the Independent Children's Monitor on behalf of the Crown. Unless indicated otherwise for specific items or collections of content (either below or within specific items or collections), this copyright material is licensed for re-use under the Creative Commons Attribution 3.0 New Zealand licence. To view a copy of this licence, visit <http://creativecommons.org/licenses/by/3.0/nz/>. In essence, you are free to copy, distribute and adapt the material, as long as you attribute it to the Independent Children's Monitor and abide by the other licence terms. Please note that this licence does not apply to any logos, emblems, trademarks, photography or imagery on the website or to the website's design elements. Those specific items may not be re-used without express permission.

Published February 2023

Independent Children's Monitor
PO Box 1556
Wellington 6140
New Zealand
Email: info@icm.org.nz
Web: www.icm.org.nz

ISSN 2816-0355 - Print
ISSN 2816-0363 - Online

He Kupu Takamua Nā Te Tumu Whakarae Me Te Tumu Aroturuki

Nau mai ki tā mātou rīpoata poha tuarua mō ngā wheako o te pūnaha manaaki me tā ngā uepū whai i te National Care Standards (NCS) Regulations.

Ko te rīpoata whakataki nō houanga te wā tuatahi i wātea ai te nuinga o ngā raraunga mō te NCS Regulations ki te marea. He tūāpapa i whakatakotoria. Hei whakautu, i tuhi atu ngā uepū e kawē ana i te haepapa manaaki i ngā tamariki me ngā rangatahi ki te Minita mō ngā Tamariki mō ngā mea e mahi ana e rātou ki te whakawhanake i te kōunga o ā rātou mahi manaaki.

E tuku ana tēnei rīpoata i te āheinga tuatahi ki te kite mēnā rānei kei te whakatinana aua uepū i tā rātou i kī ai, ā, mātua rā, mēnā rānei kua whanake te kōunga o te manaaki. Kia hihira i tēnei, i whakaemi anō mātou i ngā raraunga mai i ngā uepū e kawē ana i te haepapa manaaki i ngā tamariki me ngā rangatahi, ka mutu, i whakarongo ki ngā reo o te hunga wheako. Ka kite ana i tēnei rīpoata, ko ngā kōrero me ngā mātau-ā-wheako o ngā tamariki me ngā rangatahi, o ō rātou whānau, o ngā katiaki me te hāpori kei te poka pū o tā mātou huarahi aroturuki.

Kati, e whakapakari haere ana ngā uepū i ā rātou kaupapa mahi, heoi, kāore anō kia kite i tētahi pānga (o ēnei whakapakaritanga) ki ā rātou raraunga, ki ngā reo rānei i whakarongohia e mātou.

E rua ngā kaupapa kei te kaha kitea. Kia roa ake te wā ki te whakatū me te whakaū i te whanaungatanga, ahakoa kei waenga i te tauwhiro me te tamariki, i te kaitiaki me te whānau, i waenga i ngā uepū rānei. Ka rongo ana mātou mō te pai o ngā mahi, i te nuinga o te wā, nā te kaha o te whakapono ki tētahi whanaungatanga i pērā ai. Ko te mārāma ki ngā hiahia o ngā tamariki me te kaitiaki, ā, ko te mahi tahi ki te tuku i ngā ratonga me te manaakitanga e hiahia ana.

Me whai wāhi hoki ngā uepū kē atu ki te tuarā i te kōunga o ngā mahi manaaki. Ko tētahi kaupapa he rite tonu te kite ko te iti rawa o te mahi tahi me te whakawhitiwhiti kōrero ka puta i waenga i ngā tari

kāwanatanga. Mō te wāhi ki ngā tari-whakawhiti me tō rātou takohanga ki te Mahere Mahi a Oranga Tamariki, ka whai kia kite i tētahi pānga aureka ki ngā mea ka puta ki te papa, ka mutu, mēnā he rerekē te āhua o ngā kōrero kei ngā hāpori ki tā mātou e rongo ai.


E aro ana tēnei rīpoata ki te oranga o ngā tamariki me ngā rangatahi e manaakitia ana (e te pūnaha). Kia mana ana te Oversight of the Oranga Tamariki System Act hei waenganui i te tau 2023, ka whakawhānuitia tā mātou hōkainga ki te aroturuki i te Pūnaha Oranga Tamariki – tae ana ki ngā mahi e mahia ana ki te tautoko i te whānau, ki te whakaheke i te tūraru ki ngā tamariki, ka mutu, ki te aukati i tā rātou kuhu mai ki te pūnaha manaaki. Mā tēnei e tūmanako ana mātou ki te tūari ki a koutou ngā raraunga me te māramatanga ki ngā putanga pīnakitanga ki ā mātou rīpoata anamata katoa.

E whakarite ana mātou ki tēnei tūranga kua whakawhānuitia, ka mutu, e mahi tahi ana ki te Kaitiaki Mana Tangata me te Tari Manaakitia a Tātou Tamariki ki te whakatūturu i te whakaaro kāore he kūaha hē ki ngā tamariki, ki ngā rangatahi, ki ngā whānau me ngā katiaki.

Ko ngā whakamānawa o te ngākau ka toro ki ērā i noho tahi ki tō mātou kāhui aroturuki i te tau ka hori. I whakatauhia mātou e koutou ki roto ki ō koutou hāpori, ō koutou tari, me ō koutou kāinga, ka mutu, i whakapono mai kia whakaputahia ā koutou kōrero e mātou kia whanake ai ngā putanga ki ngā tamariki me ngā rangatahi e manaakitia ana. E kiri whakauka ana ā mātou tāngata ki te whakawhanake i te pūnaha manaaki ki ngā tamariki, ki ngā rangatahi me ō rātou whānau anō hoki. Ko te rīpoata nei te hua o ā rātou mahi.



Arran Jones
Tumu Whakarae



Nova Banaghan
Tumu Aroturuki

He mihi

Ka mihi mātou ki te katoa i kōrerohia e mātou, ka mutu, te māramatanga i tūarihia e ētahi. Kāore mātou e mahi taratahi, ka mutu, e whakapono ana mātou he mea hirahira kia āhukahukatia te motuhaketanga, otirā, te taupuhipuhi anō hoki o te māramatanga ki te pūnaha manaaki.



Ngā Kitenga Matua

Kei tēnei wāhanga o tā mātou rīpoata whakatakotoria ai ngā kitenga matua. E mātua hāngai ana ēnei kitenga ki a Oranga Tamariki, kei a rātou te nuinga o ngā tamariki me ngā rangatahi e manaakita ana, e tiakina ana hoki.

Ko wā mātou kitenga he mea tō mai i ngā raraunga nā Oranga Tamariki me ētahi atu uepū e aroturukitia ana i tuku mai, ka mutu, ngā māramatanga i kohi mai i wā mātou toronga aroturuki ki ngā hapori puta noa i te motu.

I kitea e mātou:

He wāhi whanaketanga kua puta, heoi anō, kāore anō kia tutuki i a Oranga Tamariki ngā whakaritenga ture ki te aroturuki ake i tāna whai i te National Care Standards Regulations.

Kia angtū ai tā ngā tauwhiro whakatinana i tō rātou tūranga me roa ake te aheinga o te wā ki te noho tahi ki ngā tamariki, ngā rangatahi, ngā whānau, ngā kaitiaki me ngā hapori.

Ki te kore e taea e ngā kaimahi ngā mahi ahurea ko te whanaungatanga i waenga i a Oranga Tamariki, te whānau me ētahi atu rōpū whakahaere ka raru.

Ki te hāpai i ngā tamariki me ngā rangatahi ki te whakapūaki i ō rātou whakaaro, ki te whai wāhi ki ngā whakatau, ka mutu, ki te tuari i ō rātou māharahara, me mōhio rātou ki ō rātou mōtika.

Kāore i te tino mārama te horapa o te hauātanga i waenga i ngā tamariki e tiakina ana.

He rite tonu tā ngā kaiāwhina kōrero mai, kia kaha ake te tautokohia o rātou.

Ko te hononga i waenga i a Oranga Tamariki, ngā kaiwhakarato hauora me te mātauranga me ngā hapori hoki kei te tiwara tonu.

Ko te koretake o te wāteatanga me te āheinga ki ngā ratonga hauora hinengaro kei te noho tonu hei āraitanga.

Ehara i te mea he rite tonu te whakamātauria o ngā kaitiaki me ō rātou whāmere e Oranga Tamariki i mua i te whakanohotanga o ngā tamariki ki a rātou.

I roto i tāna urupare ki tā mātou ripoata i ngā tau 2020/2021 i tautuhitia e Oranga Tamariki he whānuitanga o ētahi kaupapa i whakaarohia e rātou ka whakawhanake i tā rātou whai i te National Care Standards (NCS) Regulations. Hui katoa ko ngā wāhi kua whakatinanahia he kaupapa, he tōmua rawa ki a mātou kia rongo mō ngā pānga ki ngā wheako o ngā tamariki, o ngā rangatahi me ngā hapori.

Kāore anō kia tutuki i a Oranga Tamariki ngā whakaritenga ture ki te aroturuki ake i tāna whai i te National Care Standards Regulations

Hui katoa, kua kitea e mātou ahakoa kua whakawhanake haere a Oranga Tamariki i tāna aroturuki i tāna ake whai i te NCS Regulations, ko tāna aropā me whakapakari tonu.

Ko te tikanga o tēnei ka auwhi ko te Kāhui Hautū o Oranga Tamariki i roto i tā rātou āheinga ki te whai māramatanga ki te kounga o te manaaki, ki te mārama kehoheko kei hea ngā wāhi o te mahi e eke ana, kei hea ngā wāhi hei whakapakari, ka mutu, ki hea tino whakapaua kahatia te aro.

Ahakoa kua tukuna mai ki a mātou e Oranga Tamariki tā rātou maherehuarahi hei whakatauiria i te roanga atu o tā rātou whakawhanake i tā rātou pūnaha aroturuki ake, i te korenga o Oranga Tamariki e whakahaere i tāna ake pūrongo mō te whai i te NCS Regulations i mate mātou ki te whakarite i tētahi tono kōrero taipitopito anō i tēnei tau.

I te marama o Maehe, i te tau 2022 i tuhi mātou ki te Tumu Whakahaere o Oranga Tamariki, mō te māharahara ki te ngoikore o te anga whakamua ki te aroturuki katoa i a ia anō. I whakatenatena mātou i a Oranga Tamariki kia kaua e tatari kia whakahoungia te pūnaha, e ai ki tā rātou maherehuarahi, heoi, kia tōmua ko ngā wāhanga tino hirahira ināiane, ka mutu, mō ia tamaiti kei te tiakina, kia kaua e kaha whakawhiriki ki ngā kōnae aromatawai take. Ko ngā wā kāore he rāraunga kei te pūnaha, koina pea te wā pai hei whakauru i te pūrongo ā-ringa. I te wā i hui mātou ki te Kāhui Hautū o Oranga Tamariki i te Oketopa 2022 i whakamārama mai rātou kei te whakamomori rātou ki te whakapai ake, heoi, kāore e rite tonu te tae o ngā pūrongo ki a rātou mō ngā wāhanga matua e hāngai ana ki tā rātou whai i te NCS Regulations.

Hei whakataurite, i tēnei tau i taea e Open Home Foundations me Barnardos te tuku raraunga me ngā kōrero hoki mō ia tamariki e tiakina ana e rātou ki ia wāhanga tika. E whakarato ana tēnei i tētahi taumata kē atu o te kī taurangi.

Kia angtū tā ngā tauwhiro whakatinana i tō rātou tūranga me roa ake te aheinga o te wā ki te noho tahi ki ngā tamariki, ngā rangatahi, ngā whānau, ngā kaitiaki me ngā hapori

I kōrero mai ngā tamariki, ngā rangatahi, ngā whānau me ngā tauwhiro he aha te hua ki a rātou ka puta ana tētahi hononga whai tikanga. Ko tā rātou, ka hua mai ko te āheinga ki te whakatū, ki te whakawhanake i te whanaungatanga ngākau pai me te whakaute, nā tēnei, ka wātea te ara ki te aromatawai i te haumarutanga, i te tika o te tuku i te ratonga ka mutu, te whai wāhi tahi ki ngā whakataunga matua mō te tiaki.

I tēnei tau, e ai ki a Oranga Tamariki i toro rātou ki ngā tamariki e ai ki te aromatawai o te tamaiti, i whakarite rānei te 65 ōrau i te nuinga o te wā. E ai hoki ki a Oranga Tamariki i roto i te 70 ōrau o ngā kōnae take i aromatawaingia i kitea te tamaiti e te tauwhiro tōnā ia waru wiki. E tohu ana ēnei raraunga i te whanaketanga, heoi, nā te panoni o te āhua ine i tēnei, kua kore e aro i a mātou te whānuitanga.

Ko tētahi kaupapa e kaha horapa ana te kite i ngā putanga ko te uaua ki ngā tauwhiro ki te whai wā ki te whakarite i ēnei whanaungatanga, ka mutu, i whakapūmautia e ētahi tamariki, rangatahi me te whānau kāore e putuputu te kitea o rātou e ngā tauwhiro i ngā wā e hiahiatia ana. I tērā tau i ripoatangia e mātou e ai ki te auau kei ngā taipitopito o tā rātou mahere, 38 ōrau o te wā i kitea ngā tamariki e ngā tauwhiro (nō ngā kōnae aromatawai take).

Putā noa i ngā hua katoa i rongo hoki mātou i ngā tauwhiro, ngā hapori me ngā mātanga mō te hiahia ki te whakawhanake i te whakawhitihiti kōrero me te mahi tahi a ngā ratonga. Ko ngā wāhi i kitea, ko ngā tangata i whai wāhi atu, ka mutu, ko te whanaungatanga i waihangia e rātou.

He roa te wā ki te whakatū whanaungatanga, ka mutu, he putuputu te kī mai a ngā tauwhiro he āraitanga ā rātou kawenga mahi, ā, he tāpaetanga nui tēnā ki te hurirapa o ngā kaimahi.

Hei urupare i tā mātou rīpoata o mua, i kī mai a Oranga Tamariki kei te whakatakoto tāna Practice Framework hou i ngā mōtika o ngā tamariki me te whānau ki te iho o ngā whakaharatau tauwhiro ā-ture, ka mutu, kua noho matua ko te toro a ngā tauwhiro ki ngā tamariki. Nō reira, e tūmanako ana mātou kia rongo kōrero mō ngā pānga o ēnei panonitanga hei ngā toronga hapori anamata.

Ki te kore e taea e ngā kaimahi ngā mahi ahurea ko te whanaungatanga i waenga i a Oranga Tamariki, te whānau me ētahi atu rōpū whakahaere ka raru

Nō mātou ka toro i rongo mātou mai i ngā tamariki me ō rātou whānau mō te pēhea o ngā piropiro ki te motu o te here ki tō rātou ahurea. I tuari hoki ngā whānau i ō rātou wheako ki te āhua o te whakamātauria o rātou i te mea he Māori.

He pānga tō te mātau o te kaimahi ki ngā mahi ahurea ki te hononga ki nga tamariki me ō rātou whānau me te āheinga o rātou ki te tārai i te pūnaha, ka mutu, te whai tautoko. I kōrero mai ngā kaimahi o Oranga Tamariki mō te wāhi o te ngoikore ki ngā mahi ahurea me te iti o te tautoko mai o ngā kaiwhakahaere ka noho hei āraitanga ki te whakatū whanaungatanga.

I kōrero mai hoki ngā kaimahi o Oranga Tamariki mō te pāmamae heke iho me te matakana o nehe o Oranga Tamariki, ka mutu, i whakamānawa i te hirahira o ngā kaimahi Kairaranga ā-whānau ki te āwhina i ngā tamariki ki te hono ki ō rātou whānau whānui. I kī mai ngā Kairaranga ā-whānau hei ngā wā e ngoikore ana ngā kaimahi ki ngā mahi ahurea ko ngā hononga i waenga i a Oranga Tamariki me te whānau ka raru.

I kōrero mai hoki a Oranga Tamariki i waenga i tēnei wā tonu me te marama o Hūrae 2024, ka aro rātou ki te whakawhiti rauemi ki ngā hoa me ngā hapori, ka mutu, te tautoko i te katoa o āna kaimahi ki te waihanga pūkenga tika me te kaha ki te kawē i ngā mahi kia kounga. Tērā hoki ētahi Kaiarataki kua whakaika tauhoutia i ngā whaitua ki te whakaako me te tautoko i ngā kaiarahi i roto i te aronga panonitanga ki te mahi.

I kōrero mai hoki a Oranga Tamariki mō Whānau Care, arā, ko tētahi mahi takohanga ki te Tiriti o Waitangi me te wāhanga 7AA o te Oranga Tamariki Act i kōnei kei te Tumu Whakarae te mana ki ngā tamariki me ngā rangatahi e tiakina ana, ā, kua tukuna te haepapa o ia rā ki te tiaki me te whakahaumarū ki a Whānau Care Partner ki te ārahi i te tūhononga o ngā tamariki ki ō rātou whakapapa.

Ā tērā tau ka rīpoatanga e mātou ngā tāngata me ngā panonitanga kaha ka whakatinanahia e Oranga Tamariki, ka mutu, ka tuari ngā aronga mō te āhua o tā rātou tāpaetanga ki ngā kaimahi e whakawhanake ana i ngā whanaungatanga whai tikanga ki te whanau, ki te hapū, me te iwi.

Ki te hāpai i ngā tamariki me ngā rangatahi ki te whakapūaki i ō rātou whakaaro, ki te whai wāhi ki ngā whakatau, ka mutu, ki te tuari i ō rātou māharahara, me mōhio rātou ki ō rātou mōtika

I kōrero mai ngā tamariki me ngā rangatahi ka tukuna ana he taipitopito kōrero ki a rātou mō ō rātou mōtika he āwhina tēnei i a rātou kia mārama, ka mutu, kia whai wāhi rātou ki ngā whakatauanga ki tō rātou manaakitanga. I rongo mātou mō te pānga o te hononga aureka ki ngā tauwhiro me te āhua o tā ngā kaitiaki me VOYCE Whakarongo Mai wāhi nui ki te āwhina i ngā tamariki me ngā rangatahi ki te mārama ki ō rātou mōtika, ka mutu, te whakapūaki i ō rātou whakaaro.

I rongo hoki mātou i ngā tamariki kāore i mōhio ki ō rātou mōtika tae ana ki ngā mōtika ki te mautohe. I kōrero ngā tamariki me ngā rangatahi ki a mātou mō te kore o rātou e whakarongohia ana, e tautokohia ana rānei ki te whai wāhi ki ngā whakatauanga matua mō ō rātou oranga. I kitea tētahi āhuatanga pēnei i ngā kitenga i tō mātou rīpoata o te tau ka hori.

Hei urupare ki tā mātou rīpoata i te tau 2020/2021, i kōrero mai a Oranga Tamariki e whakakaha ana rātou i te pūnaha whakahoki kōrero me te mautohe mā te whakatakanga Manaaki Kōrero, ko ia kei te mahi tahi ki a VOYCE Whakarongo Mai. Ahakoa, ko tō rātou aronga matua i ōna wā ko te rangatahi kei ngā kāenga, kua whakahoungia e rātou te rauemi “My Rights, My Voice” mā ngā tamariki me ngā rangatahi e tiakina ana me te whakauru i tētahi Practice Framework hou e whakatakoto ana i ngā mōtika o ngā tamariki me te whanau ki te iho o ngā whakaharatau tauwhiro ā-ture.

Kāore i te tino marama te horapa o te hauātanga i waenga i ngā tamariki e tiakina ana

I te tau 2020 i whakaputaina e te Kōmihana Uiui a Te Karauna mō te Tūkinotanga i te Wā Tiāki tāna pūrongo o te wā, Tawharautia: Pūrongo o te Wā. Ko tā te pūrongo tuhi he iti te raraunga ki te hia tāngata kua kuhuna kia tiakina, te hia rānei tāngata hauā kei tētahi momo tiakitanga. E ai ki ngā neka, i mua i te tau 1996, kāore te kāwanatanga i paku kohi raraunga okawa ki te nama of ngā tāngata hauā.

I tohu hoki te pūrongo kei te kite mātou nā te ngoikore o te raraunga ki ngā tāngata hauā e tiakina ana kei te ārai tā mātou māramatanga ki ngā wheako o tēnei rōpū. Hei tā Trish Grant kaiwhakahaere o te kokiri ki IHC whakatakoto pōhutautia nōna ka wānanga i te aroturuki o ngā tāngata hauā kei te whai matauranga- Ngā mea ka kautehia e koe he whaihua, ka mutu, ngā mea kāore koe e kaute kāore he hua.

I kōrero mai a Oranga Tamariki kāore anō tāna kaitohu hāuatanga o te wā nei kia panoni mai anō i te tau 2011, ka mutu, he iti rawa te whakaaro nui o te hauātanga kei waenga i ngā tamariki e tiakina ana. I tēnei tau i whakapae te kaitohu hauātanga he 14 ōrau o ngā tamariki kei te tiakina he hauātanga tō rātou. I whakahaere ngā kōnae aromatawai take i tētahi tauria o ngā tamariki 756 e tiakina ana i whakapae he hauātanga tō te 25 ōrau. E tohu ana tēnei kāore a Oranga Tamariki, te Monita rānei e taea te kite whānui i te āhua o te kounga ki ngā tamariki he hauātanga tō rātou.

Hei urupare i tā mātou rīpoata o mua, i kōrero mai a Oranga Tamariki ko ngā whanaketanga ki te kaitohu hauātanga ka whakahaerehia hei ngā marama tōmuri o te tau 2022, ka whakamahia kētia ko ngā puna raraunga o roto i a rātou anō pēnei i ngā aromatawai tomokanga, ka mutu, ka whakatakingia he ara tohu hauātanga hei te marama o Hepetema 2022. Kua tohua hoki e Oranga Tamariki tētahi Kaitohutohu Whakarae hou, te Hauātanga me tētahi Rōpū Tohutohu Hauātanga, ka mutu, kei te whakawhanake i tētahi Rautaki Whakakitenga Hāuatanga.

Nō reira e tūmanako ana mātou ki te kite i ētahi whanaketanga nui ki te āhua o tā Oranga Tamariki tautuhi i ngā tamariki e tiakina ana he hauātanga tō rātou i roto i ngā tau e haere ake nei.

Ehara i te mea he rite tonu te whakamātauria o ngā kaitiaki me ō rātou whāmere e Oranga Tamariki i mua i te whakanohotanga o ngā tamariki ki a rātou.

E whakahau ana te NCS Regulations i a Oranga Tamariki ki te aromatawai i ngā kaitiaki anamata me ō rātou kāenga i mua i tā ratou whakanoho i ngā tamariki me ngā rangatahi ki a rātou. E whakarato ana hoki te NCS Regulation hei ngā wā kōhukihuki e taea ana e Oranga Tamariki tētahi whakamanatanga o te wā, ā, kia whakahaere aromatawai poha hei te wā e taea ana.

E tohu ana tā Oranga Tamariki rauemi mahi kounga ("QPT") he 32 ōrau o ngā tamariki i whakanōhia i mua i te whakaotinga o ngā wāhanga katoa o te aromatawai i mua rānei i tētahi whakamanatanga o te wā. I tutuki te 53 ōrau o ngā kēhi i tirohia, tētahi aromatawai poha i mua i te whakanohotanga o te tamaiti. 31 ōrau o te 47 ōrau e toe ana i aromatawai takitarotia.

Ahakoia he wā tōna kāore i whakatutuki te aromatawai katoa, e tohu ana tā Oranga Tamariki QTP tata ki te katoa o ngā kēhi i whakatutuki i ngā arowhai Pirihimana me ngā arowhai tuakiri.

He hekenga tēnei i tā te whai i te NCS Regulations i tērā tau, arā, o te 20 ōrau o ngā tamariki i whakanōhia i mua i te whakamanatanga o te wā, i whakamātauria pohatia rāneitia.

I ahu mai ēnei raraunga i ngā kōnae aromatawai take. Ki te whakaaro ki te pānga o te panonitanga wāhi tiaki ki ngā tamariki me ngā rangatahi, he mea hirahira kia whai whakapūmautanga a Oranga Tamariki ki ngā kēhi katoa kia hāngai, kia haumaruru te whare ki ia tamaiti, ka mutu, kia taea e rātou ngā tamariki katoa e tiakina ana te rīpoata.

Kei te kite hoki mātou mai i ngā raraunga a Oranga Tamariki, kāore rātou i te whai i ngā tikanga ki te arotake i te whakaaetanga o te kaitiaki i te wā tika. Ka wānangahia whānuitia tēnei ki te putanga Aroha.

He rite tonu tā ngā kaiāwhina kōrero mai, kia kaha ake te tautokohia o rātou

Kei te tohu mai ngā raraunga a Oranga Tamariki e whanake haere ana te tautokohia o ngā kaitiaki. Ko ngā hua nō te rūritanga o ngā kaitiaki e tautokohia ana e Oranga Tamariki i te tau 2021, e kitea ana tōnā haurua o ngā kaitiaki i urupare ki te rūritanga i mākona i te tautoko ka whakaratohia e Oranga Tamariki. I ripoata hoki a Oranga Tamariki ko te 75 ōrau o ngā kēhi i arotakengia, i mau mahere tautoko kaitiaki, i tohungia ngā taunakitanga pūtea e hiahia ana e te kaitiaki ki te mahere-he iwa ōrau whanaketanga tēnei nō te tau ka hori.

Heoi anō, he rite tonu tā mātou rongo ko ngā wāhi whakatā he matea kāore tonu e tutuki me te 72 ōrau o ngā mahere tautoko kaitiaki e tohu ana i te hiahia kia toro ki te wāhi whakatā.

E whakaatu ana hoki ngā raraunga Oranga Tamariki i roto i te 48 ōrau o ngā kēhi i arotakengia, ko ngā tauwhiro o ngā kaitiaki kei te whakatinana i ngā mahere mahi ki te whakatutuki i ngā hiahia o ngā kaitiaki.

I kōrero mai hoki ngā kaitiaki mō te kore o te whai wāhi ki ngā tauwhiro i ngā wā e hiahia ana, ka mutu, ko te koretake o ngā taipitopito ka tae ki a rātou mō ngā tamariki me ngā rangatahi e tiakina ana e rātou. I rongo hoki mātou mō te āhua ki te whakanohotanga o ngā tamariki ki a rātou hei ngā wā ohore, hei wāhi whakatā, ka mutu, ka whakaroahia (mō te wā roa i ōna wā) me te kore o te mōhio o ngā tamariki, ngā rangatahi, ngā kaitiaki rānei ka hia te roa o te nohonga.

I te marama o Hurae 2022, i whakarite a Oranga Tamariki i tētahi Pūnaha Taipitopito Kaitiaki (CGIS) hou, ā, kua hangaia kia pai ake te kite i te tautoko ki ngā kaitiaki.

Ko te hononga i waenga i a Oranga Tamariki, ngā kaiwhakarato hauora me te mātauranga me ngā hāpori hoki kei te tiwara tonu

I a mātou e toro ana i rongo mātou i ngā tātanga e rite tonu ana te kī kāore he hononga i waenga i a Oranga Tamariki, ngā ratonga mātauranga me te hauora, ka mutu, ngā NGO e tiwara tonu ana; Kāore he hua o te whakawhiti kōrero me te mahi tahi, ka mutu, kāore i te tino māmā ngā mahi me te kawenga ki te tautoko i ngā tamariki e tiakina ana ki te whakatutuki i ngā hua pai.

Ko Oranga Tamariki rāua tahi ko ngā kaimahi mātauranga i kōrero mai ko te koretake o te whakawhiti kōrero tētahi āraitanga ki ngā tamariki me ngā rangatahi ki te angitu i roto i te mātauranga. Ko ngā tauwhiro Oranga Tamariki i kōrero mai he uaua i te wā kāore ngā kura e hiahia ki ngā tamariki Oranga Tamariki, ka mutu, he horo te tauhohe ki tētahi whanonga kei “waho i te rārangi”.

I kōrero mai ngā kaimahi mātauranga mō te takarepa o te whakawhitiwhiti kōrero me te mahi tahi, inā koa, ka raru i te wā ka whakawhiti ngā tamariki me ngā rangatahi ki tētahi kura hou, me te kore i whakamōhio atu ki te Tāhuhu o te Mātauranga i te nuinga o te wā.

I rongo hoki ki ētahi karere e rite ana ki tēnei i a Oranga Tamariki me ngā kaimahi hauora e hāngai ana ki te whakatutukitanga o ngā hiahia ā-hauora o ngā tamariki me ngā rangatahi e tiakina ana. I rongo mātou kāore ngā ratonga i te mahi tahi ki te whakahaere ā-rautaki i a rātou whakaeminga rauemi, ka mutu, ki te whakarato i ngā ratonga hauora mā ngā tamariki me ngā rangatahi e tiakina ana.

I te marama o Hurae i te tau 2022 i whakaputaina te Mahere Mahi a Oranga Tamariki. Ko te mahere nei he takohanga nā Oranga Tamariki, nā Te Tāhū o te Ture, nā Te Manatū Whakahiato Ora, nā Te Tāhuhu o te Mātauranga me Ngā Pirihimana O Aoteroa ki te mahi tahi ki te whakatairanga i ngā huanga pai me te oranga o ngā tamariki me ngā rangatahi kei te nui te hiahia. E tohu ana te mahere ko ngā āki e pāngia ana e ngā whānau he pīroiroi, he kino kē atu, ka mutu, he mea whakapaparanga, hei āpiti hoki ko te whakakotahitanga o ngā pānga o te pōhara, o te kaikiri me te whakahāwea, o te roa o te kore mahi, o te iti o te pūtea, o te taretare o te whare, o te kore i aro ki ngā hiahia ā-tinana, ā-hauora hinengaro hoki, o te kai taru me te inu waipiro me te tūkinu whānau.

He rerekē te tautoko i ngā hiahia ā-hauora, ka mutu, he āraitanga tonu te tautoko ki te hauora hinengaro

I te marama o Nōema i te tau 2022, i noho tahi mātou ki ngā māngai matua o te Manatū Hauora ki te wānanga ka pēhea tā te Manatū āwhina ki te whakatutuki i ngā hiahia ā-hauora o ngā tamariki e tiakina ana. I kōrero mai rātou mō ngā takohanga i whakaritea e te Manatū Hauora i raro i te Mahere Mahi ā Oranga Tamariki. Ko ngā mahi he tautoko i a Oranga Tamariki ki te kawē i tētahi aromatawai rētō o ngā hiahia ā-hauora, tae atu ki te hauora hinengaro, te mātāmua o te tiaki me ngā hiahia ā-hauora motuhake. E tohutohu mai ana te Manatū Hauora mā te tika o te whakanoho e taea e ngā kaimahi whānui, ngā nēhi, me ērā atu mātanga hauora te whakarite, te whakatū me te whakaū i te whanaungatanga ki ngā tamariki me ngā rangatahi mā tēnei hoki e taea e rātou ngā hiahia ā-hauora te tautuhi me te whakatutuki.

I raro i te NCS Regulations, me whakarite e Oranga Tamariki kia riro tautoko ngā tamariki me ngā rangatahi ki ō rātou hiahia ā-hauora, tae atu ki te āta whakarite ara ki te kuhu i ngā tamariki ki ngā ratonga hauora mātāmua. E tohu mai ana ngā raraunga a Oranga Tamariki kua 53 ōrau o ngā tamariki me ngā rangatahi kua rēhita ki tētahi Tākuta, ka mutu, kua heke mai i te 60 ōrau i tērā tau. I pātai mātou ki a Oranga Tamariki mēnā e pai ana tā rātou whakamōhio mai mēnā e tae ana ngā tamariki ki ngā whakamataunga ā-tau hauora me ngā niho e ai ki te tikanga kei te NCS Regulations, heoi, kāore tonu ēnei raraunga e wātea.


Ko te mahi tahi hoki i waenga i ngā uepū tētahi kaupapa nui i rongo ai mātou mō te tautoko i te hauora hinengaro o ngā tamariki me ngā rangatahi e tiakina ana. I kōrero mai ngā tauwhiro kua riro mā rātou ngā tamariki me ngā rangatahi e wheako ana i ngā anīpatanga o te hinengaro e tautoko, ka mutu, kāore he tohungatanga e tika ana, he awhina rānei mai i ngā mātanga.

I kitea hoki e mātou hei ngā wā whakaaro ai mātou ki te nama o ngā āwangawanga i toko ake mō te hauora hinengaro o ngā tamariki, te nama o ngā tamariki me ngā rangatahi ka tirohia e Oranga Tamariki ki te whakatau mēnā e pāngia ana rātou e te tūkino matū, e mate ana i te raruraru hinengaro, e raru ana rānei i te mate whakamomori he āhua iti.

E ai ki ngā raraunga kua whakaratongia e Oranga Tamariki, kei te kite mātou ko te horapa o te whakamahinga o ngā rauemi me ngā taputapu hauora hinengaro he iti. I te tau ka hori, i kōrero mai a Oranga Tamariki mō te nama o ngā tamariki kei tā rātou kōnae aromatawai take me whai aromatawai, nā wai rā, ka aromatawaingia. I tēnei tau, kāore i taea e rātou, ka mutu, i taea noa e rātou te whakarato ki a mātou te nama o ngā aromatawai i oti i a rātou mai i ngā kōnae aromatawai take.

E hiahia ana mātou ki te mārāma kehokeho he aha e iti nei te whakamahinga o ngā taputapu me ngā rauemi i tēnei wāhanga, ina koa, hei ngā wā kōrero mai ngā tauwhiro kāore i a rātou te tautoko, ka mutu, ngā tohungatanga e tika ana. Ka nui hoki te āwhina ki te whai māramatanga ki te nawe mēnā i pai kē atu ngā raraunga mai i a Oranga Tamariki.





**Aroturuki
Tamariki** | Independent
Children's Monitor

aroturuki.govt.nz



Te Kāwanatanga o Aotearoa
New Zealand Government